



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : Tir Yimyim

tiryimyim@aolima

tir yimyim

TAPAK 8



Gaza rara mechi Israel den Colombia  
tesendaktep rakdangtsü: Petro

Salima Tete India tetsür hockey  
team captain kumogo

VOL. XXI ISSUE NO. 200 (ADOK 200) DIMAPUR ROGONÜ (FRIDAY) MONUPII (MAY) 03, 2024 ₹ 5.00

## Advisor to CM & IDAN chairman Abu Metha-i Kyrgyzstan semdang

Dimapur, Monupii/May 02

(TYO): Advisor to Chief Minister, Chairman IDAN aser Nagaland Olympic Association indang secretary general, Abu Metha-i Kyrgyz Republic semdanga liasü.

Pa ya Kyrgyz Republic yimtiba Bishkek nung Alysh (Belt Wrestling) Grand Prix nung tongti tesemdang liasü.

Metha ya taoba Deputy Prime Minister aser tang Committee on Constitutional Legislation, State Structure, Judicial and Legal Issues and Rules of Procedure of the Jogorku Kenesh (Parliament) of the Kyrgyz Republic indang chairman Sultanbekova Cholpon Aalyevna-ia jaoka liasü. Cholpon ya World Belt Wrestling Committee of United World Wrestling indang tir lir.

Metha-ia ibi linük semdangba mapang Culture, Information, Sports and Youth Affairs indang deputy minister aser Department of Physical Education and Sports nung director Abdymomunov Aybek Tynchylykovich, World Alysh Federation tir Baiaman uulu Adilet aser Kyrgyz Parliament indang deputy speaker Nurlan Azygaliev nungertem den senden mena liasü.

Item senden nung linük ana tsüngta tesendaktep tali tashi itshitsü, saisapong ajungkettsü asoshi lungjemer inyaktüsü jembia liasü.

Iba mapang Metha-ia India rongsenketzung ainba indang tongmelang agi rasaa aser ato kilonseri India indang indigenous & traditional sports temaba jenjangi ajungkettsü nükjidong aliba indanga shia liasü.

Indian Belt Wrestling Team nung Metha ya dena liasü aser iba telok nung Indian Belt Wrestling Federation tir aser Asian Belt Wrestling Federation tir Omarmukhtar Tamboli-a liasü.

Indian team nung athletes pongu, technical judge ka aser Nagaland nungi technical ketdangsur asem oa liasü.

Alysh (Belt Wrestling) Grand Prix nungya India tenung nungi Nagaland nungi Rokuo Kire Khawakhrie-ia 70 Kg category nung bronze medal ngua liasü.

Kyrgyz Republic nung ketdangsur aser tongtipang nisungtem den senden amenba mapang saisapong aser talisa wrestling nung maneni lungjemer inyaktüsü onüktem benoka jembiogo, ta Metha-ia ashi.

(Maneni tapak 2 nung...)

## Wokha power transmission tower laoba ken o nung nisung ka puogo



Dimapur, Monupii/May 02

(TYO): Nuts aser bolts auyaba ajanga April 27, 2024 nü Yikhum aser Riphym village tsüngta 132 KV Wokha-Sanis transmission line indang 132 KV single circuit tower laoba dak sendakba nung tai tonglokja alisang puogo, ta Wokha district indang Additional Superintendent of Police, K Soriso-ia metetdaktüsü.

Tower ka lapoba atema Executive Engineer (Transmission), Kohima division, Namheu Khate Zeliangi tezüluba nung ashishitep ken o ka agütsüba sülen iba ken o bushisüngdangtsü atema Wokha SDPO Sangthing Kham lenisüba kübok team ka tenteta liasü, ta Soriso-ia ashi.

Bushisüngdang mezüng tenzüka mapang tower members indang nuts aser bolts samar aliba ngutet aser item ya mejangjaba nisung kari agizüka auya agi südi ta temulung melemi

liasü, aser iba yongji tower ya lao. Parnoki temeket tesemtem nung temulung melemi alirtem aser yinsang-yinre ayokertem den asüngdangya süa kanga junga ken o asadanga liasü.

Technical teyari aser Wokha Cybercrime Cell teyari nung parnoki ken o arorepa oa nisung ana dak temulung melemeti liasü.

Iba sülen parnoki iba ken o nung tai tonglokja alir tongtiba, Yikhum village nungi arishi küm 32 tain Likho Kithan ya April 30 nü apu, shiba tang Wokha kübok Tsumang "A" Colony nung telidak lir, ta ashi.

Tai tonglokja alisang anema ya U/S 379/336 IPC R/W U/S 3 Damage to Public Act R/W U/S 136 Electrical Act kübok ken o benoka lir.

Tarutsü nung iba ama matalokdaktüsü mechi iba ken o nung sendaktepa alir ajak aputsü mera ajunga agitsü, ta Wokha nung aliba police temi ashi.

## Moatsü mapangdanga kintem jaoka benjongba nükshir: C&S Kevichusa



(Abelen) Chuchuyimlang nung aliba Anü Mai Amphitheatre nung May 2, 2024 nü Moatsü amungdang tangokba aser (Achiji) Commissioner and Secretary Kekhrievor Kevichusa IPoS-ia Moatsü sentong jembiapa noksa yangi angur. (Chuchuyimlang, May 02, 2024)

Chuchuyimlang, 2nd May

(TYO): Chuchuyimlang yimdak Moatsü benjong den repsema Yaküki HiEERA Development Projects Pvt. Ltd tenzüksü tamaitüsü lungzüng azüngba sentong Anü Mai Amphitheatre, Chuchuyimlang nung meraketa agiogo. Sentong nung telok balalai akhi tsürabur yimya nung sobotsü sobur kentenmenü aser yartsüngsang balala ia tesentepertem kanga longsodaktüsü.

Iba sentong nung tetushi tesemdang, Kekhrievor Kevichusa IPoS, Commissioner & Secretary, Department of Industries and Commerce, Govt. of Nagaland-ia jembidang, Chuchuyimlang nung Moatsü amungba ya nüburtem rongnung sobaliba kentenmenü sentong ka dangbo masü, saka tanga kintem jaoka iba ama külemi benjongtepba ya tenükshitsüka. Nüburtem tsüngta tesentaktep yangluba den temba yimtepa telungjem nung aliba ya tashitsü tulu aser iba ama mapa ya Naga nungger ajaki angazüksüla, ta metetdaktüsü.

Yaküki HiEERA Development Projects Pvt. Ltd ya tongtibang mapatong ka lir. Yimertemi inyaknüa jangrabangra tejakleni aruba ngua kanga pelar, department nenok den lir aser iba mapatong

takok angutsü asoshi akokba nung yariteptsü ta pai metetdaktüsü.

Asenoki kodang Nagaland nung terenlok aser industry tsütsü reprangdangdir, takok anguba otsü maka, paisa sugar mill aser paper mill tamakok anguba atishia ashi. Item tamakok anguba kuli kar ashidang, iba mapangji asen nisungtem tazü liasü. Item mill reprangtsü atema tetemsü nübu maliasü, kechisarena ajak tangaleni nungi dang anir arua inyakdaktüsü merang. Iba mapangji govt-a aser nüburtema iba amala mapatong renloka bener aotsü asenok renema maliasü, ta pai ashi.

Tanü Nagaland nung tebilemstü tulutibaji 'mapa manguba' (unemployment) ya lir. Iba tebilemstü ya sorkar kisüngi solve mesütettsü, sorkari nübur nem mapaji iba tashi dang agütsütettsü, iba dang tali magütsütettsü. Tanü sorkar mapa angutsüba jitemela masü, tetoktepbaji ulura kumogo. Iba tebilemstü ya yimertemi yim toktür bendang balalai lensai aoba kisüng jagia solve mesütettsü, ta pai ashi.

Yaküki HiEERA mapatong amala amenoka timi bener aoba ajanga rongsenketzung nung nüchiso angutsü ngujem lir. Tanü joko sobaliba tsütsü tesentaktep

ayuba dang masü saka rongsenketzung nunga tesentaktep ayutsü tennungdaktüsü. Nüburtemi arok khuret angateta lungjemer shilem agiba ajanga iba mapatong ya takok angutsü imlar aser tanga district atema-a tashitsü tajung sayudaktüsü, ta paisa mepishia metetdaktüsü. Govt-ia yaritsüla saka tongtibangsa nübur nungi tejangraba aser tenungitba kanga nungdaker, ta paisa shisem.

Kekhrievor Kevichusa IPoS-ia Yaküki HiEERA Development Projects Pvt. Ltd tenzüksü lungzüng ka azüngtsü. Lungzüng lapokdang P. Tokugha Achumi, Director, Directorate of Industries and Commerce Govt. of Nagaland aser Arnab Chakraborty, National Director, Empretec India Foundation Kolkata tena densamba den sentong nunga shilem agia liasü.

Sentong nung Chang kin nungi Yangpi Cultural Troupe, Konyak kin nungi Ukha Cultural Troupe, Phom kin nungi Yaongyimchen Cultural Troupe, ano kidanger yim Unger Cultural Club Troupe, aser Chuchuyimlang Kaketshir Telungjem, 7 buba Kosasanger Süngpu Zünga Chuchuyimlang, Arju Club Chuchuyimlang aser ano telok kati azuto ken atandang ainertem aniloker shilem agia liasü.

## Aoyimkum nung Moatsü mung meraketa mungogo

Dimapur, Monupii/May 02

(TYO): Dimapur district kübok Aoyimkum yimdak playground nung Moatsü mung meraketa May 2, 2024 nü mungogo.

Iba sentong nung tongti tesemdang Dr. Tinojongshi Chang, NCS, Deputy Commissioner, Dimapur liasü aser pai Moatsü salem o jembidang Moatsü mung nung lanurtemi jangrabangra shilem agiba ngua pelar ta ashi.

Moatsü mung ya benjongmung ka kisüng masü saka telungjem benjongba mapang ka lir, ta ashi.

Asen sobaliba ya zülua mali, anungji lanurtem nem angazükdaktüsü tim, aser sobaliba ya asen ayak/maitsü lir, ta pai ashi.

Sobaliba wazüka ayutsü ya tongtipang ta ajiteta state sorkaria

Hornbill festival kisüng masü saka district shia Mini Hornbill festival ayongzüker, ta ashi.

Asenok asoshi tebilemstü balala atema solution ji telungjem dang lir, anungji asenok lungjemer Dimapur aser nüburtem asoshi inyakti arungma, ta Dimapur DC ajanga ayongzüker.

Dimapur ya 'mini Nagaland' amai lir, kechiaser yangi kin balala nübu adenshia lir, anungji asenok ka kuma lungjemer litetra, danga district temia asen dak nungi iba jakla-yimya tajungji angazüksü, ta Dr. Tinojongshi Chang-ia ashi.

Aoyimkum Baptist Arogo nungi pastor, Rev. I. Temsu Aier-ia Lai zünga sarasadema iba benjongmung tenzüka liasü. Iba sülen Imchainba, Chairman, Aoyimkum Village Council ajanga

tayongzüka o jembi aser Kaketshir Telungjem Aoyimkum ajanga Aongmesang ken tena liasü.

Iba sentong nung L. Nükshi Ozukum ajanga Moatsü benjongmung rateta ashi, Aoyimkum Lanur Telungjem ajanga yar tsüngsang agi shilem agiba den ar atsütepba nung tetoktepbaji agia liasü.

Aoyimkum nung aliba tetsürtemi naklu ken aten aser sempet agütsüba mapang agia liasü. Iba sülen Imsüniken GB ajanga melepzüng o jembi aser sentong tembanga Rev. I. Asenla Jamir, Asso. Pastor Women, ABA ajanga sarasadema liasü.

Iba benjongmung lenir Dr. Bendangyangerla Imchen liasü aser sentong temer Moatsü mung benjong chiyongba mapang agia liasü.



# Chakpa Putu Menden-i Chakpa nunger mezüngbuba UPSC nung takok angur nem tetushi agütsüba sentong agi



Chakpa yimtak Chakpa Medemsanger Putu Menden-i ayongzüka agiba sentong nung UPSC CSE 2023 AIR Rank-915 nung adoker Chubalemba B Chang-i jembidang tangokba noksa.

**Mokokchung, May/ Monupii** (TYO): Tanu Chakpa yimtak Chakpa Medemsanger Putu Menden-i ayongzüka Chakpa yim nungi Union Public Service Commission ajanga agiba Civil Service Examination kokteter mezüngbuba Chubalemba B Chang UPSC CSE 2023 AIR Rank-915 nem tenungsang

agütsüba sentong agiogo. Iba sentong nung Chubalemba B Chang-i mapang tatsüka agia jembidang pai pa Nagaland University, Lumani nung MSc. Chemistry aser Indira Gandhi National Open University (IGNOU) nungi Political Science nung Master degree ajangzüktet aser

iba sülen pai kidang nungi dang pei sasa meranga kaket balala meranga azüngba sülen trokbenbuba nung iba takok tajung ya ngutetba lir ta pai takok anguba kuli agütsü.

Chubalemba-isa ajak dang shisaliok nung temulung agütsütsü kechiaser shisaliok ajangadang temelenshi tajungji bener arutsütsü ta ashi. Tsüngrem akhümtsüba meranga inyakba ajanga takok tulu ya ajangzüktetba lir ta arishi küm 30 tain UPSC-CSE takok anguri ashiba den 'iba takok tulu ya Tsüngremi pa sarasadem langzüba ka lir ta ashi.

Yimtsüng dangi konang nüngsang tulu bener arutsüba ya Tsüngremi Chakpa nunger sarasadem langzüba lir ta Chakpa Village Council Chairman Imkonglemba-i Chubalemba nem akhüm tetushi agütsüba sentong nung kuli agütsü.

Chakpa yimtsüng nungi alimai metetba lenir tajung adokdakjang ta küm aika Chakpa putu yimsüsürtem, Arogo tenzükertem aser yimer sensosangertem itashia mezüng Amungnü shia sarasadema aruba temoatsü Council Chairman-isa ashi.

## School Education Dept.-i metetdaksür

**Dimapur, Monupii/May 2** (TYO): School Education department-i sangdong ka ajanga, state kübok Department-i temelaba agütsür aliba Pre-Schools ajak dang, recognition atema application

format Department indang official website <https://education.nagaland.gov.in> nung angutsü ta metetdaksüogo. Iba format ya website nung April 25 nungi May 31 nü tashi angutsü.

State nung permitted Pre-School ajaki iba format ya download süa June 30 nü mesüra iba anogo matong tsüngda department nem agütsütsüla, ta kasa sangdong ajanga metetdaksü.



**क्षेत्रीय शिक्षा संस्थान, भुवनेश्वर**  
**REGIONAL INSTITUTE OF EDUCATION, BHUBANESWAR**  
 (National Council of Educational Research & Training)  
 Sachivalaya Marg, Bhubaneswar-751022

**Admission to Various Teacher Education Programmes of Regional Institutes of Education**

**Advt.No.479** **Date : 29.04.2024**

The National Council of Educational Research and Training (NCERT), New Delhi is an autonomous organization set up in 1961 by the Government of India, Ministry of Education to assist and advise the Central and State Governments on policies and programmes for qualitative improvement in school education and teacher education. The eight constituent units of NCERT located in different parts of the country, include: (i) RIE, Ajmer, (ii) RIE, Bhopal, (iii) RIE, Bhubaneswar, (iv) RIE, Mysuru, (v) NERIE, Shillong, (vi) NIE, New Delhi, (vii) CIET, New Delhi and (viii) PSSCIVE, Bhopal.

Applications are invited on-line from the eligible applicants for admission into various Teacher Education Programmes, viz., (i) B.Sc.B.Ed. (4-year), (ii) B.A.B.Ed. (4-year), (iii) M.Sc.Ed. (6-year), (iv) B.Ed. (2-year), (v) B.Ed.-M.Ed. (3-year) and (vi) M.Ed. (2-year) run under Regional Institutes of Education.

The on-line application form is available w.e.f. **30/04/2024 to 31/05/2024** at [www.cee.ncert.gov.in](http://www.cee.ncert.gov.in) Common Entrance Examination (CEE) will be conducted at various centres across the country on **16th June, 2024**. For details, visit our URL: [https://cee.ncert.gov.in](http://cee.ncert.gov.in)

For any query, contact CEE-2024 Help desk phone numbers +918280337189/ +918280337190 or the e-mail [ceesupport2024@riebbs.ac.in](mailto:ceesupport2024@riebbs.ac.in)

Sl.No.	Important Event	From	To (Last Date)
1	On-line Registration and Submission of Application Form	30.04.2024	31.05.2024
2	Downloading Admit Card	10.06.2024	16.06.2024
3.	Date of Common Entrance Examination (CEE) 2024	16.06.2024 (Sunday)	
4	Last date of Uploading the Marks of the Qualifying Examinations for Applicants appearing CEE-2024 (B.Sc.B.Ed./B.A.B.Ed./M.Sc.Ed.)	20.06.2024*	
5.	Last date of Uploading the Marks of the Qualifying Examinations for Applicants appearing CEE-2024 (B.Ed./ B.Ed.-M.Ed./M.Ed.)	30.06.2024*	
6	Declaration of Result of CEE-2024 (B.Sc.B.Ed./B.A.B.Ed./M.Sc.Ed.)	05.07.2024*	
7	Declaration of Result of CEE-2024 (B.Ed./ B.Ed.-M.Ed./M.Ed.)	10.07.2024*	

\* Subject to change by notification in CEE Portal.

**Principal  
RIE, Bhubaneswar**

## Pughoboto nung EVM/VVPAT Strong Room asadang

**Dimapur, Monupii/May 2** (TYO): Chief Electoral Officer, Nagaland, Vyasam R, IAS-i May 2 nü ADC & DEO Office, Pughoboto nung EVM/VVPAT Strong Room aser Counting Hall asadangogo.

Tawa tembangba 18buba Lok Sabha Elections atema iba EVMs/VVPATs yua aliba Strong Room ya amshir aser iba ya B/78 Bn CRPF Sechu

Zubza Personnel temi nüka lir. CEO meina Additional CEO, Awa Lorin aser Deputy CEO, Roland Merry na oa liasü aser parnoki ADC & DEO Tiamerong Chang; SDPO, Hankiumong aser EAC, Khriethozo Pfkuri nunger matsüngdang iba takdang asadanga liasü. Party tirtem aser political party balala nungi lenirtema iba sentong nung densema liasü.

## Manipur nungi Myanmar nungertem meyipa yokogo

**Imphal, Monupii/May 2** (Agencies): Ozüng alema Manipur-i aiter aliba Myanmar nungertem pei linüki meyipa yokba mezüngbuba shilem takok ngua tembangogo.

Iba osang ya Manipur chief minister N Biren Singh-i Brehostibarnü metetdakja liasü.

"Myanmar nungi ozüng alema arur alirtem pei linüki meyipa yokba mezüngbuba shilem tanü tembangogo," ta Manipur chief minister N Biren Singh-i Brehostibarnü ashi.

Ozüng alema arur alir nisung 38 Manipur aser Myanmar na arrtsü nung amenoker aliba Moreh checkpoint adenaogo.

"Shinga bendanga mamshi-i onoki ozüng alema arur aliba Myanmar nunge 38 meyipa yokba mezüngbuba shilem takok ngua agiogo aser parnok tanü Moreh ajanga Manipur, India toktsürogo," ta pai ashi.

Myanmar nungertem ketdangsürtem nem bendanga agütsüba mapang India nungera ka Myanmar nungi meyipa anir aruogo.

Mezüngbuba shilem nung ajak senteper Myanmar nunger parnok 77 Manipur nungi meyipa yokogo.

Maneni Manipur CM-i ashiba agi, state sorkari ozüng alema arur alirtem jangjatsü merangdar aser kasa mapang nung biometric data mangaoka yudar.

"Asenoki asen arrtsü aser linük kümzüka yudi," ta Manipur

CM N Biren Singh-i ashi.

Manipur chief minister N Biren Singh-i, state nung yimtsüng tasen 996 amenokba süokia agiba metetdaksü aser ashiba agi, item ya ozüng alema arurtemi amenokba lir.

Paisa, ozüng alema arurtemi yimtsüng tasen amenokba ya lisopur aser linük security atema tebilemtsü lir, ta ashi.

"Ozüng alema bendangertem senoka aitba ajanga yimtsüng tasen aser nütsünyongsük balaka renloka aoba ajanga pei state mesüra linük nung demography melenshiba ya agizüktetsü na?" ta Manipur CM-i asüngdang.

Paisa, Manipur tebilemtsü tulu ka agi meneper lir, kong 2006 küm nungi tanü tashi nung Myanmar nungi ozüng alema nüburtem senoka aitba ajanga yimtsüng tasen aika kümtetogo, ta ashi.

CM Biren Singh-isa, bendangertem yimtsüng tasen mesemetba ajanga arem tuluka raksatsüogo aser iba den parnoki poppy tsünür, ta ashi.

"Item bendangertem yagi alirongsen, mapa, ali aser linopurtem temden atsünger," ta CM-i ashi.

"Onoki ozüng alema state-i arurtem indang biometric data benden tenzükogo aser parnok talidak geotag asü tenzükogo. Ni lisopur ajak dang bendangertem nungi linük kümzüka ayutsü atema sorkar nongita yaritsü mepeshir," ta Biren Singh-i ashi.

## Advisor to CM & IDAN... (TAPAK 1 NUNGI...)



Advisor to Chief Minister, Chairman IDAN aser Nagaland Olympic Association indang secretary general, Abu Metha-i Kyrgyz Republic semdangba mapang Jogorku Kenesh (Parliament) nung pa agizükba noksa ka yangi angur.

Nagaland nung North East Games ayongzüka alidang iba asayamung tembangba sentong nung World Alysh Federation tir Baiaman uulu Adilet ya tongti tesemdang liasü.

World Wrestling, World Alysh aser Asian Belt Wrestling tir tem den senden amenba mapang India aser Nagaland atema capacity building, workshops aser seminar ayongzüksü indanga jembi, ta pai ashi.

Item ya ajanga Nagaland

nungi athletes temi linük tenting nung international sapang nung tokteptsü maangka tali angutsü, ta Metha-i ashi.

Ajidang masü national aser international sapang nung indigenous Naga wrestling ajungkettsü sentongtem renema lir ta pai metetdaksü.

Pai Kyrgyz Republic nung sport ministry aser sports infrastructures amala tongtipang tesemtem semdang aser saisapong ketdangsürtem den sensaksema liasü.





May 02, 2024 nü Gujarat kübok Bhavnagar nung Delhi Chief Minister Arvind Kejriwal kinüngtsü, Sunita Kejriwal-i Bhavnagar constituency nungi AAP candidate, Umesh Makwana atema nüboyimtsü dang tangokba noksa nung angur.

### CoWIN certificates nung Ato kilonser Modi noksa agienadokogo

**New Delhi, May 02 (Agencies):** Coronavirus vaccine 'Covishield' agiba ajanga temang nung timtem agütsür, ta osang prokba mapang nung CoWIN Covid-19 vaccination certificates nung Ato kilonser, Narendra Modi indang noksa agienadokogo.

Coronavirus wara mapang nung India nung nüburtem nem agütsüba coronavirus vaccine rongnung Covishield-a densema liasü.

India nung coronavirus vaccine agir ajak nem item certificates agütsü. Vaccine certificates nungji Ato kilonser Modi noksa den India-i longjemer iba wara anema raraba indang o zülua lir.

Certificates nungji "Longjemer India-i COVID-19 tamakok ngudaktsütsü" ta zülua lir.

AstraZeneca-i Covid

vaccine 'Covishield' agiba ajanga nisung karbo temang nung timtem agütsütsüa akok, ta nangzükogo. Court nung AstraZeneca-i, parnok indang Covishield ajanga karbo azü atsüngtsüa (blood clot) akok aser platelet count ajemtsüa akok, ta nangzükogo.

Covishield ya wara mapang nung AstraZeneca aser Oxford University-i yanglua liasü aser Serum Institute for India-i produce asüba sülen India nung nüburtem nem agütsü.

Sandeep Manudhane-i X ajanga, "COVID Vaccine certificates nung joko Modi noksa mangur. Reprangdangtsü atema download asü - au, pa noksa agienadokogo," ta metetdaksü.

Ano Irfan Ali-ia, "Au, tang ni reprangdangogo aser Ato kilonser Modi noksa samaogo aser pa noksa melen QR code

dang lir," ta metetdaksü.

CoWIN certificates nung temelenshi dak sendakba nung Ministry of health & family welfare nungi ketdangsertemi, Lok Sabha election atema Model Code of Conduct (MCC) benoka aliba agi CoWIN certificates nung Modi noksa agienadok, ta metetdaksü.

Tamalena state pongu- Uttar Pradesh, Uttarakhand, Punjab, Manipur aser Goa nung assembly election agidanga Covid vaccination certificates nungi Modi noksa agiena liasü.

Ano külen Bodhbarnü opposition Congress-i, Centre nung BJP sorkari World Health Organisation (WHO) telatetba kübok meinyak, ta aitsüba den külemi tamalen Covishield agiba sülen temelungjang tashidak agi asür kinüngertem nem senotsü temenok agütsütsüla, ta takhangba agütsü.

### Congress-i Hindu nunger tsüngda telemsa adokdaksütsü meranger: PM Modi

**Surendranagar, May 02 (Agencies):** Brihostibarnü Ato kilonser Narendra Modi-i Congress aitsüba den külemi Congress party Tir, Mallikarjun Kharge-i tawa Lord Ram aser Lord Shiva indang jembiba olen aitsüogo.

Paisa, opposition party-i temesüzükba politics atema Hindu nunger tsüngda telemsa adokdaksütsü meranger, ta aitsü.

Gujarat kübok Surendranagar nung Surendranagar aser Bhavnagar Lok Sabha menden nungi tokteptsüpur BJP candidates atema nüboyimtsüba sentong ka nung jembidang Modi-i, tamangba yimsü nung ajemdaker reservation agütsütsü benokba ajanga Congress-i linük temzüng yirutsüogo; Congress-i sorkar contracts nung Muslim nunger dang quota nangzük, ta ashi. "Tang Congress-i Hindu

nungertem tsüngda telemsa adokdaksütsü meranger. Congress Tir Mallikarjun Kharge-i lendong adoktsüsa Lord Ram aser Lord Shiva indang olen jembigo. Item o ya tebilemba tamajung yur jembiba o lir. Parnoki Hindu nunger tsüngda telemsa adokdaksütsü atema asaya ka asayar," ta Modi-i metetdaksü.

"Parnoki Lord Ram aser Lord Shiva külemertem tsüngda telemsa adokdaksüner. Mughal nungertemia asenoki küm meyrjang aika benschia aruba sobaliba meraktsütsüti liasü, ajisüaka tang Congress-i ibaji raksatsütsü meranger ma? Congress-i mesüzüktsü atema koba tashika inyaksü?" ta pai asüngdang.

Mongolbarnü Chhattisgarh nung Congress party candidate Shivkumar Dahariya atema nüboyimtsüba sentong ka nung jembidang Kharge-i, "Pa

tenüng Shivkumar lir. Pai Ram den tokteptetsü, kechiyong pa Shiva. Ni-a Mallikarjun. Ni-a Shiva lir," ta jembia liasü.

Modi-isa, Ayodhya nung Ram tekülem ki meshiteta semzükba sentong nung adentsü atema Congress aser parnok pusemertem jaoka liasü, ajisüaka parnok magizük, ta ashi.

Paisa, "Nüchiso melen parnok linük ana küma lemsa. Terenlok bener arutsütsü melen parnok teket nung aliba dang auya. Sensakertem nem meyiba agütsütsü melen Congress-i parnok senpong nung dang rizüng. Tang Congress-i Muslim nunger nem reservation agütsüner aser parnok ibaji tesüba küm 30 tashi meranga arur," ta ashi.

Paisa, June 4 nü election agiba osang sangdongba sülen pai linük tesem ajaklen campaign ka tenzuka linük temzüng indang angatetdaksütsü, ta metetdaksü.

Office of the  
**JAMIR KIDONG TELONGJEM**  
Merangkong PIN - 798618  
Dist. Mokokchung : Nagaland

**TENÜNGSANG AGÜTSÜR**

Merangkong Jamir Kidong Telongjem Mendenti ajanga NBSE-i ketdang süa agiba High School Leaving Certificate Examination 2024 nung tangar dang nungi alakteta takok tulu aser konang nüngsang bener arutsü nung kidong tenüng nung tena nem tenüngsang aser tetushi tulu agütsür.

- Sp. Benjungakum Jamir**  
Wb. Meyitangi taser Wt. Moanaro na jabaso.  
Top 9th jenjang Don Bosco School Tuli.
- Sp. Imkongsungit Jamir**  
Wb. Korachiba aser Wt. P.Imtikala na jabaso.  
Top 17th jenjang Fern Wood School Kohima

Iba den külemi kidongsanger sangpang aser kongro shirnokisa HSLC aser HSSLC 2024 examination nung takok tulu nguogo nenok ajak nem tenüngsang aser tetushi tulu agütsür.

Maneni nenok sempet tajung tim lenmang nung amshiba ajanga tarutsü anogotem nung takok tulu bener arutsü sarasadema atar.

**Sd/- M.Jongpongyanger**  
President

**Sd/- Tiawapang**  
General Secretary

### India-i USCIRF indang religious freedom report aitsür

**New Delhi, May 02 (Agencies):** Brihostibarnü India-i US Commission on International Religious Freedom (USCIRF) indang religious freedom report aija, "Iba organisation ya yimtenren tsütsü nükjidong yur inyakba telok ka lir," ta aitsü.

India-isa, India nung nübur temeyoktep aika aliba aser India nunger democratic Commission-i angatetsü India-i meimlar, ta ashi.

USCIRF-i 2024 report nung India densema linük 17 Countries of Particular Concern (CPCs) nung züngoktsü benoka lir. Tamangba yimsü temeden anema inyakba atema USCIRF-i US state department dang item linük CPC list nung züngoktsü benok.

USCIRF report aija Ministry of External Affairs (MEA) otongdar, Randhir Jaiswal-i, USCIRF-i maneni India anema

olulu proker, ta metetdaksü. "USCIRF-i yashi parnok indang 2024 report sangdongogo. Parnoki item report sangdonga arur. USCIRF ya yimtenren onük yur tejak repranga inyakba organisation ka lir. Parnoki India anema olulu maneni proker," ta pai osangbenertem nem metetdaksü.

"USCIRF-i India nung nübur temeyoktep aika aliba aser India nunger democratic tangatetbatem angatetsü, ta onoki meimlar. Parnoki alima nung voters teimtiba aliba election nung jangjongtsü merangyonga kodanga takok mangutsü," ta paisa ashi.

USCIRF report nungjisa Manipur aser Haryana na nung rara, sorkari 2019 küm Jammu & Kashmir nung Arrla 370 agienba aser yaküm Supreme Court-ia ibaji medentsüba sülen Kashmiri lenirtem aser separatists aika apuba indang shia lir.

### Shaksgam Valley ya India shilem ka lir: MEA

**New Delhi, May 02 (Agencies):** China-i Shaksgam Valley nung kiojen asüba ashishia Brihostibarnü Ministry of External Affairs (MEA)-i China sashia aitsüogo.

MEA-i, China-i Shaksgam Valley nung kiojen yangluba anema India-i China sorkar nem tashishiba metetdaksüogo, ta ashi.

"China-Pakistan boundary tezüngzüktepji India-i kodanga magizük, koba ajanga Pakistan-i ozüng alema China nem iba area agütsütsü meranger," ta MEA-i metetdaksü.

MEA-isa, "Shaksgam Valley ya India nunger litsü shilem ka lir," ta ashi. Osangbenertem den jembidang Ministry of

External Affairs (MEA) otongdar, Randhir Jaiswal-i, "Shaksgam valley ya India shilem ka lir aser 1963 küm China-Pakistan boundary tezüngzüktep agibaji New Delhi-i kodanga magizük, iba tezüngzüktep ajanga Islamabad-i ozüng alema Beijing nem iba area agütsütsü merang," ta metetdaksü.

"Onoki iba tashishibaji aiben metetdakja arur. Ozüng alema litsü melenshitsü merangbaji onoki ashishia China nem metetdaksüogo," ta Jaiswal-i metetdaksü.

Shaksgam valley ya Pakistan-occupied Kashmir (PoK) kübok asalentong atema kanga tongtibang tesem ka lir.





## TIR YIMYIM YIMOBILEM (EDITORIAL)

DIMAPUR ROGONÜ, MAY (MONUPII) 03, 2024

### Mapa agi moatsü amonger

**A**otsür Aortem ya mapa meinyakba kin asünungbo moatsü benjong ya memongla, kechiyong aluyimba mapa o moatsü benjong na ya sendaktepa lir. Ano, tongtibangtiba kaji, Aotsür Aortem ya mapa inyakba kin süaka Tsüngrem memetetba kin asübo moatsü amongstsü nungdak madokla. Aji oda, Ao kin ya tekong nung tsük lu ayimba kin asünungji, Metsüremi aser Rongchii (March aser April) na tashi nung alu atenba mapa temer anisüngzüka pelatepa amongba benjongmung anogo dang masü saka Moatsü ya Sobatiaba Tsüngrem dang alu nung tsük nungi tenzüka metsüjangnutsü kechisarina zünga yutsüba madak temoatsü aser teküzmükba meshia sarasadema amongba mung lir. Aji oda, mapasa asüyonga Ao kini munga aruba benjongtem ya aluyimba den sentaktepba benjongtem dang lir. Ajisüaka, tanü asenoki tsük lu mayimba agi moatsü amongstsüba ya mapa meinyak ser shi den chiyonga pelatepa amongba anogo mung amai ka dang bilemer. Atangji, akhi putu nung tsük lu dang yima aruji tanüa kasa tsükluji dang ayimtsüla ta masü, tanübo tsük lu ayimba dang nungi mebelemi terben agi talila tajangzük angutsüsa tanga mapa aika lir, anungji town nung alirtembo yutsür, tanübo, yimtak alirtemia tekong nung tsük lu mayimer. Ajisüaka, tsük lu mayimba agi tanga mapa meinyaker ta masü nisung shia pei taküm aser kibong nungdak asoshi mapa ka mesüra kabosa inyaker, anungji akhi tsüraburtemi alu mapa tapu ka temer anisüngzüka pelatepa amongba den Tsüngrem tashi bilemteta amongba ama, tanüa asenok kechi mapa nung lidir liaka Moatsü benjong ya asenok ajak asoshi pei pei mapa khen tipdema yutsür kinunger medemertem den pelatepa amongba aser külemi Tsüngrem külemba mung ka kümdakja amungtsübaji tanü putu mapang aser mapa dak petpeter asütsü. Iba jagi asenok nem küm shia moatsü amungtsü asoshi khuretsa bilemdaktsütsü aser jelia meranga inyaka renemtsübaji, akhidang ama, sobaliba akümtsü. Tanübo asenok teimbakati moatsümung ya mamonger, kechiyong alua mayimer aser asen mapa agi yimtsür yimer aser medemertem den pelatepa amungtsüa merajemer aser Tsüngrem dang temoatsü meshiba aser tenüngsang agütsüba benjong ka alakteta amongtsüa mebilemteter. Atangji, asenok aikati anogo shia Tsüngrem dang sarasademer aser mapa inyakerkem aikati anogo shia pei mapa metenzükdang aser temer külen sarasadema alitsü. Ajisüaka, iba jagi yimkong külemi Tsüngrem bilemteta benjong ka amongba meküpdoker. Iba sobaliba tajung ya asenoki mesendoki amshitsübaji kanga tongtibang kümogo. Tanüa asenoki moatsümung amonger, ajisüaka moatsü amungtsüsa asenoki kecha meinyak ser tenla sarutepa tzümar jang, tzümar ak aser tzümar metsü mersü alia itemji chiajema moatsü amongba yabo tangar benjong ka ajizüka amonger amai ka dang lir. Itemji khen jungjunga shisadanga asenoki asenok sobaliba benjongmong ya züngzünga tetezü keta amongtsüsa asenok ajak mapa inyaker kaka akümtsüla. Aji oda, akok nungbo tsük aika ruzüka tajangzük angutsü apia masü saka asen sobaliba benjongbentsü aser oshioben mesamai shitak benshia otettsü atema kibong shiai tsük lu tilalabosa ayim nung junger. Asenok oshia teimbaka mapa inyakba dak sendaka lir, anungji mapa meinyakra mapa dak aketba ojang amshia jembitsüji nungdak madoker, anungji ojang aika mamshitsü, anungji oshi samatsü. Aji oda, alu ayimbaren nung, alu chidang nungi aluroba tashi nung mapa inyakdang amshia jembiba ojang aika lir, itemji alu ayim nung dang jembitsü. Tatsüba agi, tanübo asenoki alu mayimba agi 'jen' tetezüa memetet kümogo. Aji oda, aluyimdang amshiba osettem, alu nung züsentetba chiyongtsütem aser alu inyakbaren shia nung mapa tenüng ajakji alu ayim nung dang jembitsü nungdak adoktsü. Aji oda, Moatsü benjong ya benjong dangbo masü ibai pei mapa inyakba nung takok aser temoatsü angutsüba indang aser oshi mesamadaktsüi renloktsüba indang Tsüngremer sentong tulu aser tongtibang ka lir.

## OLEMSABANG ASENOK YA KECHI AJANGA SUMANGA OADOK?

- L. IMLIKOKBA IMSONG, Ungma

Naga lima nung Khrista yimsü arur joko küm 150 jongmong yaküm 2023 nung mungogo. Ni ya Rev-a masü Pastor-a masü Missioner-a masü mesüra Arogo nung putiri anir tenzüka wadang nung inyaker-a masü saka aseni amongba Yisu Khristaji kü kümtetdakba, kibur aser kümzüksang ta angatetba agi iba oset ya Tir Yimyim sapang nung lemsateber aser aji aika liaka teraka kü tangatetba yari ashir.

Asenok Khristantem rishikangshiba, tepsetba aser tekülem ki rongdoktsüba anogo shia angur, angashir aser azünger, saka India ya nüjiso ngur temzüng-ozüng yangludang nübur shia pei tamangba, sobaliba, yimsü yimpong, jembishinü temeden menüngoka ayu. Tanü yimsüsüba ka, tamangba ka alitsü ta (UCC) benoker amshibaji asenok Khristantemia kechi ajurutsü ta ajemseter. Asenok Nagaland State ka ta süaka MP ka (representative) dang oa adongsemstsü (Tasemer mali). Dangan Hindu yimsü amangertem state ka nungia süng 80 lir (UP).

1. Asenok MLA 60 rongnung RSS, VHP (Hindu) kwi lir?

2. Mesüra Khrista yimsü dak alaka danga tamangba MLA-ji kwi lir? Ni bilem nung Khrista yimsü dak amanger timba südi.

Sürabangla koda? Tawa CM Rio-i anir tanishir aika arua asenok Naga lima nungbo yamalaji mataloker aser mataloktsü ta ashiba züngshiogo, iba ya asa-a nübur mashi leni anir asü Indian yimden nung mela-a ali? Laishiba nunga (Galatia) Paul-i shia alibaji Khrista nung kin, kidong sobaliba tebala mali ta shia lir. Saka Nagaland dak alaka dangar state tem nung Khrista yimsü amangertem rishikangshiba aser tepsetba nüburtem asoshi par dak alang parnoki meshiba ta meima aser aria mebileme ojang adi ta süoki maibaji tenyar Paul-i Laishiba nungji oda züluoka yutsüba aser tiyazü ta shitet shisadangang.

Shidakba agibo 60 pronglai onok Naga nungerbo temzüng padukerji ainshiadoker ta shitet nung India-i ojang adi tabo mesütetsü südi. Aser aji Naga nunger asoshi jenjang ajemeter asütsü südi.

Nüburtem ajaki ngua tang nenok 60 rongnung aika temaba jenjang nung mener alibaji nü dak alang masü saka Khristan yimsü mezüng samanir nübo, nübou-i timtem aser reshikangshi arema Khrista yimsü asoshi tenzüka ajanga na iba temoatsü aser jenjang nung moaja lir ta meshisadanger no.!

Kechiyong mezüng Molungkimong nungi tenzüka Ao lima yimtsüng ajak nung ka khen ka khen ta Khrista yimsü agizüka timtem tekangshi aremteta arubaji kangasa okrongseta aruba temulung agi maremtete angar. Aser aji asa-a timtemba masü, yimsü tasen asü nung alimapuri kechi koma asü aji tim dang, par tensa dak apet inyaker aser tanü aseni maitsür.

Aji oda nenok tang kechi jenjang nung ali, aji meshisadangi alirtem asoshi tia maka rongsen-a samatsü, konang-a samatsü aser generation asoshi-a oboula aser obala nunger tsüngsüji tesamadaktsü. BJP ya political party-a ta bilema liasü saka RSS VHP-i kechi ashir iba dakji ajemdaker aor. Item rongnung mongin asem tatishitsü agi Narendra Modi, Amit Shah aser Himanta Biswa Sharma asenok Khristantem asoshi Luciber asem. Aser ajiang asen kidanger Assam CM H.B Sharma-i Khristantem tekülem ki nung Yisu noksa aser kangki tashi mayutsü ozüng agütsübaji asenok Naga nunger Khristantem kechi bilemer?


Morarji Desai P.M mapang India nung Religion Bill amenok. Tatsüka lir pa Shillong nung Helicopter force landing adalok, teküzmükbo kümzük. Kobi melie Assam nung pa amenba tayimtsü tsükok aser kobi melie pa PM menden nungi atsüngdok.

2021 December ita tetenzüklen Mon District Oting nung ayanger kidangi shilanga lia Indian sepai temi arr mendanger tai maket nisüng 10 dak tali kaset aser parnok maitsü aser army medentsü. Hopta tsüngta nung India nung army tulutiba Delhi nungi southern-i aludang tayemtsütsüka tekolakba dang masü potang aikla sama-a-adok. Kechiyong parnoki tai maketer tepsetbaji shidak nung tepset ta medentsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Khristan putir Anthonysamy-i MCC alema inyak ta tai tongloktsü



George Anthonysamy

May 02, 2024: Tamil Nadu nung Hindu pusemba telok kati Khristan putir kati yimsü nung ajemdaker voters nüboyimtsü meranger, ta tai tonglokja ken o benokogo.

BJP den sendaktepa aliba Legal Rights Protection Forum (LRPF) teloki Election Commission of India (ECI) dang Tamil Nadu kübok Madras-Maylapore nung tongti putir, George Anthonysamy anema inyaksüla, ta mepishio.

Arogo indang osangkaket yimobilem ka nung putir Anthonysamy-i yimsü nung ajemdaker voters ayongtsü merang, ta April 29 nü LRPF-i

pa nem tai tongloktsü.

Tang India nung loktiliba-yimtenren tensa nung ajemdaker pai 2014 küm nungi tenzüka Modi yimsüsüba kübok Khristantem aser Muslim nungertem timtemer, ta ashi.

LRPF-i, iba ya tamangba yimsü nung ajemdaker voters temelung mepypdaksütsü atema jembiba o lir, anungji Anthonysamy-i election code anema inyakogo, ta ashi.

Anthonysamy ya Tamil Nadu Bishops Council nunga Tirilir.

Paisa nütsüing billion 1.4 aliba India nung nütsüing shilem 2.3 Khristantem ajaki vote

agütsütsüla, ta ayongzüik.

"Asenok ajaki vote agütsüdi. Iba election ya kanga tongtibang- tangatetba balala aliba telok ana tsüingda election ka lir," ta pai ashi.

Ajisüaka Arogo osangkaket nung yimobilem zülur tongti, Antony Pancras-ibo Anthonysamy pusema pai election code anema meinyak, ta metetdaksü.

May 2 nü osangbener den jembidang Pancras-i, "Atangji tongti puriti linük nung nüburtem, talisa minorities timtemba indang nüburtem nem angatetdaksütsü merangogo. Ajisüaka tongti putiri nüburtem dang party ka tenüing teta parnok nem vote agüjang ta mashi, ajisüaka sensotem ama vote agüjang ta nüburtem ajungshi," ta metetdaksü.

"Nüburtem dang vote agüjang ta ajungshibaji ozüing alema masü mesüra election code of conduct alema masü," ta Pancras-isa metetdaksü.

Tang tashi nungbo election commission-i Anthonysamy nem notice magütsü.

Lok Sabha election atema March 16 nü model code of conduct (MCC) benoka liasü. April 19 nü election tenzüokogo aser June 1 nü tembangtsü.

# Pakistan nung küm 13 Khristan tsür ka kangshia kibong kümdaksü



Sania Ameen

May 02, 2024: Tawa Pakistan nung arrshi küm 13 Khristan tetsür chanu ka puer aoba sülen kangshia Muslim nunger den kibong kümdaksür Islam yimsü dangi meypdaksüba tetsürla tebu jagi ochi temeden bushi tenzüokogo.

April 4, 2024 nü Pakistan nung Punjab province kübok Anjotar Sialkot yimdak arrshi küm 13, Sania Ameen lar ki anasa lia puer ao.

Tetsürla tebu Ameen Masih-i, lar jala shishitsü atema dokani oa aliba mapang nung tebur aseme puer ao, ta metetdaksü.

Masih-i, jala puer aoba anogo nungji lar jala kati Sania samaba

osang metetdakja liasü. Parnok ilonga kidangi meyipa aruba sülen jala bushi tenzüik.

Iba tesem nungji alir aikati Saif Ali den nisung anati Sania puer aoba metetdaksüba sülen Masih-i Ali anema ken o agütsü saka police-i ken o magizük.

Ketdangsertemi, Sania-i melunga kibong aküm aser Islam yimsü dangi meyip, ta dang shia anogo asem tsüingda ken oji tembanga liasü.

Masih-i, Pakistan nung yimsü nung ajemdaker Khristantem anema inyaker aser ketdangsertemia aibelenertem ang pusemer, ajisüaka anojungi tetsür chanu

ka kibong kümdaksübaji Pakistan temzüing kübok ozüing alema lir, ta ashi.

Paisa, "Onoki sorkar ketdangsertem dang onok (Khristantem)-a kasa senso ama züingshitsu aser ozü jala kümzüka maparen nung onok den yariteptsü mepishir," ta metetdaksü.

Tawa Pakistan nung high court kati Punjab province sorkar ka dang child marriage ozüing kübok kibong akümtsü atema tetsür aser tebur na tsüingda arrshi küm tepila kecha malitsüla, ta tetuyuba agüja liasü. April 15 nü Lahore High Court nung Justice, Shahid Karim-i, Punjab Province nung Child Marriage Act of 1929 kübok kibong akümtsü atema teburtem arrshi küm 18 aser tetsürtem arrshi küm 16 asütsüla, ta asüba ya tim masü; tetsür aser tebur naprongla atema arrshi küm telatetji kasa dang asütsüla, ta metetdaksü.

Court-i iba obendang agütsüba sülen Pakistan nung Arogo lenirtem aser meimchir temeden atema inyakertertemi, iba ya ajanga kangshia tamangba yimsü meypdaksüba aser Khristan tetsür chanutem densema minorities kangshia anojungi kibong kümdaksüba nokdangtsü, ta shia liasü.

Tang Pakistan nung tetsür aser tebur naprongla kibong akümtsü atema temsüba arrshi küm 18 lateta aliba province ji Sindh Province dang lir.

# ANOGO ABEN TSÜNGREM DEN

## Taochi agütsüba

"Nisung kati mukuroi agütsür, saka tali akar; tangar kati pai agütsütsü tim sota ayur, saka tanüing dang tendaktsür... pa dak tzü indaktsütsü" (A. Shin 11; 24:25).

Tanü aikati sen timba angulen bushia mapa inyaker, itasen tulu agir tali akümer saka tagütsür ishiba akümer. Taruba renlokba ama Tsüngrem nem agütsüba renlokra, pai tenyaba mapaa tuluba inyaktettsü.

Tagütsübaji ter shilem agütsüba nungi tenzüoktsüla. Saka asenok tanga taochi nung arendang iba taochi nunga tali arentsü. (2 Kor. 8:7). Asenok taküm nung iba yagi mapa meinyak tashi asenoki maneni agütsüjen agütsütsüla. Yangi Dawidi ayongzüokba ajiang: "Ni angati agi dang Kibuba kü Tsüngrem nem tarungba tenla magütsütsü" (2 Sam. 24:24).

"Ni Tsüngrem nem kwika agütsütsü?" Khristan aikati iba tasüngdangba asüngdang. Tasüngdangba shitakbaji, "Ni atema kwika ayutsü?" Aseni agütsüba nung tenuk merangloktsüla, saka aseni kwika agizük iba nung shisadangtsüla. Aseni agütsübaji asen meyong masü. Tsüngrem nungi kechi angu iba nungi agütsür. Pa meyong Pa nem meyipa agütsür.

Nai ni atema Ne ajak agütsü, tang ni kü ajak Na asoshi agütsür ta Pa dang shidi.

# High Court-i Chhattisgarh nung Khristantem tasü mang aremtsü melar

May 02, 2024: Chhattisgarh nung High Court-i Khristantemi pei tamangba yimsü kübok aremtsü temeden agüja obendang agütsüogo.

High Court-i ketdangsertem dang arrshi küm 54 Khristan ka tasü mang par yimdak aremtsü atema par jabaso nem agüjang aser yimertemi menokdangtsü atema police security agüjang, ta tuyu.

Bastar district kübok Chhindbhar yimdak Ishwar Korram-i Khristan yimsü agizüka liasü aser April 25, 2024 nü pa Jagdalpur jila nung aliba Dimarapal Hospital nung süadok.

Korram'er kibong züngsemtemi pa tasü mang yimdak aremtsü atema bener arutsü asüngdang, ajisüaka yimdak nütsüing teimba Hindu nungertemi memela, kechiyong yimdak Khristantem aremtsü atema temeja leper mali.

Iba sülen Korram'er jabaso, Sartik-i High Court ajurua tebu tasü mangji Khristan yimsü nung ajemdaker yimdak aremtsü atema mepishia liasü.

State sorkaria tensa meraksatsü atema tasü mangji anasa aliba Karkapara yimdak Khristantem leper nung ang remang, ta metetdakja liasü.

Ajisüaka Hindu nunger temeshi kaket nung aliba tetsüha Justice, Rakesh Mohan Pandey-i, India linük temzüing nung Arrla 21 nung ajemdaker temepishiba ken o agütsüri tebu tasü mangji pa taso yimdak aremtsü temeden lir, ta obendang agütsü.

'Yuddha Kand' lai tetsüha Justice Pandey-i, "Medemertem, rongsen aser tsükji iba lima nung kanga

akhümketa züingshir. Tetsü aser tetsü tasoliji kodak dang nungia taoba. Sartik-i tebu tasü mangji tasoli yimdak remner, anungji ibaji akhümsübutüla," ta ashi.

Justice Pandey-isa, "Arrla 21 ajanga tasü mang ka akhümketa aremtsü atema nisung nem temeden agüja lir. Iba temeden ajanga taküm ka tenzüokba nungi asüpila dak sendakba tashi ayimjema lir," ta metetdaksü.

Paisa Jagdalpur nung aliba Government Medical College dang Korram tasü mangji par jabaso Sartik nem agüjang, ta tetuyuba agütsü. Obendangerisa Sartok dang tensa meraksatsü atema tasüngnjüjisa tebu tasü mangji Chhindbhar yimdak pei li nung remmang, ta metetdaksü.

Obendangeri district police danga tasü mang aremba mapang nung Sartik'er kibong nem security agüjang, ta tuyu.

Iba sülen April 28 nü Khristan yimsü nung ajemdaker asüpila sentong agia Ishwar Korram tasü mangji yimdak arem.

High Court obendangji Khristantem densema minority telok balala aser meimchir temeden atema inyakertertemi pelaa agizükogo.

Chhattisgarh Christian Forum (CGCF) Tir, Arun Pannalal-i iba obendang pelaa agizüka, "Forum Jagdalpur chapter-ia par kibong den yaritepa liasü aser Forum nung tatong Tir Ratnesh Benjamin-ia par kibong aser telok balala den iba tensa atema yaritepa liasü. Asürtem nem akhüm agütsütsüji tongtibang aser High Court-i iba obendang agütsüba atema onoki pelar," ta metetdaksü.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Süngla**

(n) lenmang nung tetsüing ajemdaktsü süng alaba (wooden steps)

\* Alu lenmang atang nung süngla aika alatsüsa akümer.

**Sünglang**

(n) ki tatemlen yangluba sabang (deck)

\* Aseboki sünglang nung tsük apur.

**OLONG PAITEP # 6775**

	1			2			3	4
5						6		
7			8					
						9		
		10						
11								12
				13				
				14				
15								

**TIPIEN**

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latetsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

**LANGTSÜNGLEN**

- 2. Hai sür inyak - (4)
- 3. Aor tenüing ka - (6)
- 4. Ali telungi talangka lur - (5)
- 5. Tebang kenyongi mazuoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

**OLONG PAITEP # 6774 TELANGZÜBA**

**TIPIEN :**

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu,
- 15. Anünü, 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

**NAI-A YA METETTER MA**



Mongintem team kati Meghalaya nung kanga bulua manguba fossil structures ngutetogo, koba küm million 30 nungi 40 tsüingda asütsü ta asatetogo. Iba fossil ya taküm February ita Meghalaya nung South Garo Hills district kübok Gongdap yimtsüing anasa Core Geo Expedition team kati nguteta liasü. Geological Survey of India (GSI)-i iba fossil ya asadangogo. South Garo Hills districtDC-i iba fossil ngutetba jangjashitsüogo. Paise iba species indang küm tejangja GSI team-i laboratory nung asadangba sülen jangjatsü, ta ashi. Core Geo Expeditions team nung Tudor Tamas, Milton Sangma, aser Salban Manda nunger densema liasü aser parnoki ashiba agi, fossil ya "genus Rhodocetus mesüra Amulocetus" indang asütsü, koba tangbo alima nungi samaogo. Iba prehistoric shiruru ya whales indang terrestrial ancestor asütsü akok ta parnoki ashi.

**Shillong nung petrol bomb amshia police station ana amak**

**Shillong, Monupii/May 2** (Agencies): Meghalaya yimtiba Shillong nung Brehostibarnüa petrol bomb amashia tesem ana amakba metetdaksüogo.

Osang ajanga ashiba agi, petrol bomb tem ya Brehostibar anepdang Shillong Sadar police station aser Rynjah police station nung mereplokja liasü. Taoba anogo ishika tsüingda petrol bomb amshia police station tem, sorkar kiojentem aser garitem makogo.

Petrol bomb amshia tesem

balala amakertem ya tang tashi nung ka danga jangja mali, mesüra pua mali.

Brehostibarnü iba lendong matalok tsüingda Kench, Trace nung amenoka aliba Meghalaya Government Construction Corporation (MGCC) office dak petrol bomb ka mereplokja liasü. Iba petrol bomb yagi kima anena aliba garitem tera agi dang merongtoktsü aser aonung kinükeri mi ya kanga kara temsepja liasü.

Petrol bomb amashia kechiba tesem balala amaker iba indang mejangja, ajisüaka police sources kari ashiba agi, iba ya tawa non-tribal aayanger asem tepsetba atema kaketshir loktitentet züingsem kar apuba dak sendaka alitsü akok.

Iba dak sendakba nung Meghalaya sorkari department tekolak ajak dang sorkar office aser garitem kümzüka toktsütsü atema security tali akangshitsü asoshi tetuyuba agütsüogo.

**Manipur nung KCP (Noyon) züingsem ka apu**

**Imphal, Monupii/May 2** (Agencies): Manipur police-i KCP (Noyon) organization nungi S/S Sergeant Major Thoudam Nanao Singh Bodhbarnü Puogo.

State police-i X sabanag ajanga ashiba agi, parnoki .32 pistol ka, magazine ka aser injang trok nguteta liasü.

X sabang nung Manipur police-i, "01.05.2024 nü Security Forces-i KCP (Noyon) organization nungi S/S Sergeant Major Thoudam Nanao Singh @ Chingsanglakpa @ Putra (43 yrs) Thoubal District kübok Waithou tesem nung puogo. Pa ken nungi .32 Pistol ka den magazine aser injang trok nguteta liasü, ta metetdaksü.

Manipur police-isa, state kübok tenem aser lenden nung aliba district tem kong tensa mejungi lir, item tesemtem nung meita aoba aser area domination sentong ayongzüka agiogo.

Jiribam District kübok Seijang yimtsüing meita aoba mapang police temi single barrel guns trok, 108 (12) bore cartridges, empty cartridge ka, walkie-talkie radio pezü den charger, bulletproof (without BP plate) tenet, cartridge belt ana aser carry bags ana nguteta liasü.

Police temisa meita aoba mapang bunker terana raksaja liasü.

**Tzüinglu kanga sashia aruba ajanga Dima Hasao nung tekümdangtsü metetdaksü**

**Haflong, Monupii/May 2** (Agencies): Assam kübok Dima Hasao district nung Bodhbar aonung nungi tenzüka tzüinglu kanga sashia aruba sülen nüburtem nem tekümdangtsü metetdaksüogo.

Regional meteorological centre (RMC), Guwahati-i tekümdangtsü metetdaksüba sülen Dima Hasao district disaster management authority (DDMA)-i nüburtem dang Brehostibarnü nungi tenzüka May 4 nü tashi mesüra tzüinglu aruba anena tensa tajungba maküm tashi kima yimtung nung mesenzütsü tetuyuba agütsüogo.

District kübok educational institutions ajak tsüingsang majungba ajanga May 4 nü tashi shibanga atatsü asoshi tetuyuba agütsüogo.

Iba den bendenloksema tzüinglu kanga sashia aruba ajanga national highway-27 kübok Jatinga aser Harangajao na tsüingda Hokolbarnü (May 3) 8 ako tashi gari kecha senzüsenpong masütsü atema shibangtsüogo.

"Tenokdangba agütsür aliba ya asüingnep 8 ako tashi benoktsü, kechiyong lenmang tang teyangludak lir, " ta Dima Hasao district police-i metetdaksüba den national highway-27 kübok Jatinga aser Harangajao na tsüingda lenmang yanglushia aliba indang osang metetdaksü.

Jatinga-Lampur aser New Harangajao railway station nung anentsüh aiben aluba ajanga khu abentsü atema senzüsenpongtsü asoshi tetsükdaksü adoker lir.

Maibang tesem nung talisa tzüinglu kanga sashia aruba ajanga train lenmang shibangtsüogo aser ibajagi Haflong den tesendaktep raksago.

Anentsüh maneni aluba ajanga Lumding-Silchar train service shibangtsür lir.

Tekümdangtsü metetdaksür aliba mapang, tzüinglu dak sendakba jongdak maparen kar danga adokra iba indang metetdaksütsü atema Dima Hasao DDMA-i toll-free number; 03673-1077 ka amenokogo.

**Office of the MOLUNGYIMSEN SENSO MUNG DANG**  
**P.O. Tuli, Mokokchung : Nagaland**

**TENÜNGSANG AGÜTSÜR**



Joseph Lemtur  
President, MSM

Molungyimsen Senso Mungdang-i Wb. Moachiba Tzüdir aser Wt. Asüngla na jabaso **Sp. Maongkaba Tzüdir**-i ICFAI University Nagaland nungi Bachelor of Business Administration nung Gold Medal anguba atema kanga dang nüma tanga tenüngsang tulu agütsür.

Pai takok tulu ngua yimer asoshi konang bentsür aruba atema Senso Mungdang kanga pelar aser pa tarutsü wadang ajak moatsür.

B. Imsuinba Jamir  
General Secretary, MSM

**GOVERNMENT OF NAGALND**  
**DIRECTORATE OF TECHNICAL EDUCATION**  
**NAGALAND: KOHIMA**

NO.DTE/ESTT-2/02/2023-24/

/Dt. Kohima, the 2nd May 2024

**REMINDER**

This is to remind all the Intending candidates for Nagaland State Reserved seats in Para-Medical/ Agri. & Allied (UG) degree courses for 2024-25 session that selection of candidates to fill up the State Reserved seats will be done through the merit of CUET-UG (Common University Entrance Test) only.

Candidates are informed to keep in touch with the local dailies for any updates on CUET-(UG) 2024

Sd/-

(Er. VIPULHOU LHOUNGU)

Director.



**HEALTH NURSING SCHOOL**

Singrijan,  
Recognized By Indian Nursing Council,  
Affiliated to Nagaland Nursing Council, Approved by Govt. of Nagaland



**ADMISSION OPEN FOR:**

- 1) GENERAL NURSING & MIDWIFERY (GNM)
- 2) AUXILIARY NURSES & MIDWIVES (ANM)

Forms and application forms can be obtained from the office during office hour  
For more information you can visit our website: [www.healthnursingschool.in](http://www.healthnursingschool.in)  
Or email us at: [healthnursingschooldmv@gmail.com](mailto:healthnursingschooldmv@gmail.com)

Contact No. +919366938995, +917005151277, +919774043387, +919436009968

**China highway anenzüka aoba nung asür 48 jungogo**

**Beijing, Monupii/May 02 (Agencies):** China south tsütsü highway anenzüka aoba lendong nung asür nisung 48 jungogo, aser emergency team temi maneni iba tesem nungi gari tem agiteter.

State news agency Xinhua ajanga iba osang ya Brehostibar nikongdang 3:35 ako nung agüja liasü. Parnokisa nisung 30 yirua lir saka parnok takum samatsüsa jenjang nungbo masü ta ashi.

China nung May sodi tenzüka mapang Bodhbarnep iba highway ya anenzüka ao, aser akhi mapang nungi küm nung iba mapang lenmangtem kanga mazüingi alir.

Tayimtsü nungi tangokba noksa tem nunga Meizhou city aser Dabu county tsüingta S12

highway nung lenmang külen 500 shi iba tesemi yok. atsüzüka lur liasü.

State broadcaster CCTV ajanga iba tatalokba ya "natural geological disaster" aser tzüinglu tanen makai kanga sashia aruba ajanga lir ta ashi.

Lenmang ya metre 17.9 (58.7-foot) anenzüka alu aser mulushi agi sünga aliba ongken nungi gari 23 nguteta lir ta ashi.

Gari mekazüka aluba ola angashi aser iba sülen ola tulu adoka apok, ta iba lendong atalokba anasa alirtemi ashi.

"Onok gari anena yur oa reprang aser lenmang anenzüka aoba memeteti liasü," ta nisung kati ashi.

Iba highway ya anatsülen shibanga ayu aser firefighters aser mine rescue experts tem densema emergency personnel

Iba tesem nung tangokba noksa tem nunga gari teraksa atsütetba nguogo. Rescuer temi azü aser takum putetba hadir amer bushitepa liasü.

Tzüinglu maneni aruba aser lishi aser longsang anenzüka aluba ajanga timtem ajurur. Tawa Guangdong nung tzüingsang-mopung majungba ajanga alimar lendong balala ajuruba rongnung iba lendong ya tasenba alitsü.

Taoba ita tzüinglu kanga sashia arua province balala nung tzümetsüing adoka nisung pezü asü aser 100,000 dak tema pei ki yutsür tesem balalai anir ao.

Taoba hopta Guangzhou yimti nung tornado ka arua nisung pongu takum samatsü.

**Gaza rara mechi Israel den Colombia tesendaktep rakdangtsü: Petro**

**Bogota, Monupii/May 02 (Agencies):** Gaza Strip nung raraba mechi Israel den tesendaktep rakdangtsü sentong Colombia Tir Gustavo Petro-i sangdongogo, kechiaser human rights advocates aser dangar mongin temi iba rara ya kin ajunga samatsütsü merangba amai ajiteter ta ashir.

Bodhbarnü Bogota nung International Workers' Day amungdang, Gaza nung mepetmesü adoka lia linük ajem-ajema melitetsü, ta

Petro-i ashi. "Kin ka meshi meshia samatsütsüsa tir ka aliba, sorkar ka aliba mechi asüing asenoki Israel linük den tesendaktep rakdangba sangdongtsü," ta pai ashi.

2022 küm tir mendeni atusang left-wing lenir Petro ya Latin America nung "pink tide" ta ajanga progressive wave nung shilem ka ama züingshir. Gaza nung rara tenzüka sülen region nung ola adoka Israel aitsür rongnung pa

ka lir.

Israeli Defence Minister Yoav Gallant-i Nazis temi Jews den jembiba mesüktepa jembi ta Petro-i aitsüba sülen Israel-i Colombia den "security exports" anena atar ta Israel-i rara tenzüker anogo ishika dang lir October ita shia liasü.

October 7 nü Israel south tsütsü azüdokshia amakba sülen ozü linüki Gaza nung "human animals" den rarar ta Gallant-i shia liasü.

(Maneni tapak 8 nung...)

**Russia-i Ukraine rara nung chemical amshi: US**

**Washington, Monupii/May 02 (Agencies):** Rara nung chemical weapons amshitsü alimai nokdanga aliba nung aibelena Russia-i Ukraine nung sepaitem anema tango mesashitetba mozü chloropicrin amshi aser riot control agents tem yoka liasü, ta United States-i tai tongloktsü.

"Iba amala chemicals ya khen dang amshiba masü aser Russian sepaitemi Ukraine sepaitem loksaja tongpang nung par nükjidong ataloktsü mechi amshi," ta State Department ajanga Bodhbarnü sangdong ka nung ashi aser tashi ajak amshia Ukraine amakba nung Russia den sendaktepa aliba entities

nem tenokdanga tasen agütsüba sangdonga liasü.

Chloropicrin ya sentsü kangabo majiteter aser totzü ama tzü tabu ka lir aser iba yagi tenük, takep aser tepokpok rongdaksür aser World War I mapang kanga amshi, ta US indang National Institute for Occupational Health and Safety ajanga ashi. Iba mozü ya alu nung pesticides atema amshir aser 1993 Chemical Weapons Convention (CWC) kübok iba mozü ya rara nung mamshitsü nokdanga lir.

Russia-i iba mozü ya mitkar temi mamshir ta ashir, saka iba miim mozü amshiba nung tali ochi ashitsü ajungshir. Chloropicrin den ano

Russian sepaitemi CS aser CN gases inoka aliba grenades tem amshia liasü ta Ukraine mitkari ita tetenzüklen osangbener dang ashi.

Ukraine sepai 500 iba miim agi kongshiba temang anepalua liasü aser ka tear gas ajanga tango mesashiteti asü ta ashi.

2021 tashi Ukraine nung deputy prosecutor general inyaksang Gyundoz Mamedov-i April 24 nü social media nung, tesüiba ita trok tsüingta Russian army-i Ukraine sepaitem anema tear gas 900 ben amshi aser February 2022 nungi tashi ajak amshia amak tenzüker 1,400 ben dak tali amshiba lir, ta shia liasü.

(Maneni tapak 8 nung...)



Office of the **Marepkong Youth Association**

Registration no. DYRO/125/11-9-08  
Mokokchung: Nagaland

**KONANG TETUSHI AGÜTSÜR**



Wb. Wati Imsong aser Wt. Atula Noklen, tena jala **Kr. Narola Imsong-i** Queen Mary Higher Secondary School Mokokchung nungi NBSE ajanga agiba tatidang HSSLC 2024 (Science Stream) nungi Top 1 jenjang aser Chemistry nung State subject topper Award nguteta asen lanur nem konang bener arutsüba asoshi Marepkong Youth Association-i la nem konang tetushi agütsür.

Maneni HSLC aser HSSLC 2024 tatidang nung takok angur MYA züingsem ajak nem tenüngsang agütsür.

Sd/-  
**Takalong Pongen**  
President, MYA

Sd/-  
**Temjenwapang Aier**  
General Secretary, MYA

OFFICE OF THE **MERANGKONGTSÜR TELONGJEM TULI**

Dist. Mokokchung, Nagaland - 798618  
Nükjidong: "Telongjem Aser Teyaritep"

**TENÜNGSANG AGÜTSÜR**

Merangkongtsür Telongjem Tuli Unit ajanga Merangkong Senso tajung shirnokisa wadang balala nung senso sanger nem konang tetushi bener arutsüogo parnok ajak dang kanga dang pelaba lemsateper.

- 1. **Wb. Marsanen Imsong,**  
Lt. Yaongnok Imsong aser Lt Tongpangkoka na jabaso Ao Senden lenitsü (President) shimtetba.



- 2. **Sp. Benjungakum Jamir,**  
Mr. Meyidangit aser Mrs. Moanaro na jabaso HSLC Examination 2024 Top-9 jenjang nung takok ngutetba.



- 3. **Kr. Tiarenla Longkumer,**  
Mr. Moanungba Longkumer aser Mrs. Imlikumla na jala HSLC Examination 2024 Top -14 jenjang nung takok ngutetba.



- 4. **Sp. Imkongsungit Jamir,**  
Mr. I.Korachiba aser Mrs. P. Imtikala na jabaso HSLC Examination 2024 Top-17 jenjang nung takok ngutetba.



Anungji, tarutsü nunga parnok sempet aser shisa tajung ajanga lokti asoshi tajangzük aser temoatsü südakjang ta sarasadema atar.

Sd/-  
**Wt. K. Tamsunaro Jamir**  
President, MTT

Sd/-  
**Wt. Toshimongla**  
General Secretary, MTT



OFFICE OF THE **MERANGKONG KAKETSHIR TELONGJEM**  
P.O. TULI, B.P.O. MERANGKONG - 798618  
DIST. MOKOKCHUNG : NAGALAND.

**JANGJASHITSÜR**

Tir Yimyim adok 02.05.2024 anogo tapak 7 nung, Merangkong Kaketshir Telongjem ajanga TENÜNGSANG AGÜTSÜBA nung, Ms.Tiarenla Longkumer indang Percentage 96.83% aser Total marks 581 ta alibaji masu saka, Percentage 96.0% aser Total marks 576 ta jangjashitsür.

Aibelena adoktsüba atema sasa bilemer.

Sd/-  
**(SHILUTEMJEN)**  
President, MKT

Sd/-  
**(RONGSEJUNGLA)**  
Gen. Secy. MKT

**ALI AYOKTSÜ LIR**

Vihokhu village 5 puras ; Rs 50 per sq. ft.  
1 minute from highway  
Contact : 8974869756



# Madrid Open: Elena aser Aryna na semi asayatsü Alcaraz tsükogo



**Monupii/May 2, 2024 (Agencies):** Madrid Open tetsür kija asaya nung Bodhbarnü fourth seed asayar Elena Rybakina-i set ka mekoki aliba nungi meyipa atur külem Kazakhstan tsür Yulia Putintseva 4-6 7-6(4) 7-5 agi koka semi-final-i iogo.

World No. 50 Putintseva-i mezüngbuba set nung aibelen memenai kanga junga asayaba sülen lai asaya akoktsü ta bilema liasü saka Rybakina-i meranga asaya aser tatembangbuba set nung 5-2 agi tesülen aliba

mapang match point ana kümzükteta asaya koka liasü.

Asaya junga metenzüktetba sülen Rybakina-i tanabuba set tiebreak ajanga akok aser tasembuba set nunga tiebreak asayaba sülenang takok ngua liasü.

Arishi küm 24 tain asayar yagi tang mezüngbuba Putintseva kokogo. Tena tsüngda taoba asaya anabo Putintseva-i koker liasü.

Rybakina semifinal nung Aryna Sabalenka den asayatsü, shibai arishi küm 17 tain Russia

tsür Mirra Andreeva 6-1 6-4 agi kokogo.

Kasa asayamung tebur kija asaya nung Andrey Rublev-i 4-6, 6-3, 6-2 agi Carlos Alcaraz kokogo, shiba asaya 14 tashi khen danga tamakok mongui asaya liasü.

Asaya nung mezüngbuba set bo Alcaraz minute 41 nung koka liasü. Pai game pongububa nung serve ka break asü.

Tanabuba set nung Rublev-i Alcaraz indang mezüngbuba serve game break süa pa 3-0 agi tejakdang aküm aser pai asaya kokatok.

Tatembangbuba set nungbo Rublev-i serve ana break asü aser pai asaya amokbanger asaya. Tena tsüngda ghonda ana tera agi majung asaya liasü. Asaya nung Rublev-i winner 30 ngua liasü.

Pa semifinal nung Taylor Fritz mesüra Francisco Cerundolo na rongnung ka den asayatsü.

# Champions League: Dortmund-i goal 1-0 agi PSG kokogo

**Monupii/May 2, 2024 (Agencies):** Borussia Dortmund aser Paris St-Germain na Champions League semi-final mezüngbuba leg Dortmund-i goal 1-0 agi kokogo. Asaya nung goal ka ya Niclas Fullkrug-i asaya mezüngbuba shilem nung idakja liasü.

Germany nunger international asayar yagi long ball ka pa tetsüng tachichi agi agizük aser tabelen agi metsüokja minute 36buba nung Dortmund pur tejakdang aküm.

Asaya mezüngbuba shilem junga masayatetba sülen PSG-i asaya tanabuba shilem nung goal idaktsütsü atema maongka anguba aika magiteti liasü. Parnok rongnung Kylian Mbappe-ia goal idaktsütsü merang aser Achraf Hakimi-i metsüba ball post nung ondaka

liasü.

Maneni Fullkrug-i Dortmund atema tanabuba goal idaktsü lila, saka winger Jadon Sancho-i agütsüba ball ka pai bar adena metsütok.

Tang asaya aliba Champions League season nung tasembenbuba asayaba mapang Dortmund puri Ligue 1 champion team ya kokogo. Asaya nung parnoki goal idaktsütsü atema kanga nongshia asayaogo.

Asaya mezüngbuba shilem PSG puri timba amokbanger asaya ajüsüa target nung ball ka danga memetsüoktsütet aser kasa mapang nung Dortmund puri parnoksa maongka yanglua asaya.

Team ana tsüngda tanabuba leg asaya Mongolbarnü PSG indang ground nung asayatsü.

# Salima Tete India tetsür hockey team captain kümogo



**Monupii/May 2, 2024 (Agencies):** Iba ita tatemlen nungi tenzüksü aliba FIH Pro League Belgium aser England leg atema India tetsür tem nung asayar 24 shimogo aser goalkeeper tejen Savita Punia melena mid-fielder Salima Tete captain kümogo.

Navneet Kaur nem vice captain mapa agütsüogo.

Savita lenisüba nung India team Olympic qualifying campaign aser iba sülen kidang pro league asayatem asayaogo, saka takok mongutet.

Asayar asem dak alaka Taküm February ita Pro League, Bhubaneswar aser Rourkela leg nung asayaba asayatem dang team nung züngoksema liasü,

Defender Gurjit Kaur, mid-fielder Sonika aser Nisha aser striker Beauty Dungdung nung meshim aser parnok melena Mahima Chaudhary, Manisha Chauhan, Pretti Dubey aser Deepika Soreng nung shimogo.

Belgium nung asayatem May 22 nü tenzüksü aser May 26 nü tembangtsü. Kasa mapang nung England leg June 1 nü tenzüksü aser June 9 nü tembangtsü.

Mezüngbuba leg nung India team Argentina aser Belgium den asayatsü aser mezüngbuba asaya May 22 nü Argentina den asayatsü.

London leg nung India tema Great Britain aser Germany na den asayatsü.

FIH Pro League table nung India team jenjang trokbuba nung lir. Parnoki asaya ti asayaba sülen point ti nguteta liasü.

Salima nem tawa trokbuba Hockey India Annual Awards agütsüba mapang tetsürtem rongnungi Player of The Year atema Hockey India Balbir Singh Sr Award agütsüogo.

India tetsür Hockey team: Goalkeepers: Savita, Bichu Devi Kharibam

Defenders: Nikki Pradhan, Udita, Ishika Chaudhary, Monika, Jyoti Chhatri, Mahima Chaudhary.

Midfielders: Salima Tete (C), Vaishnavi Vitthal Phalke, Navneet Kaur (VC), Neha, Jyoti, Baljeet Kaur, Manisha Chauhan, Lalremsiami.

Forwards: Mumtaz Khan, Sangita Kumari, Deepika, Sharmila Devi, Preeti Dubey, Vandana Katariya, Sunelita Toppo, Deepika Soreng.

## BENDANGLI OSANG : Tapak 7 nungi...

### Gaza rara mechi Israel den Colombia tesendaktep...

Ita ka lir Israel-i kin ka samatsütsü meranger ta Petro-i aitsü aser iba yongji Israel ketdangsür aser Israel bhukumba telok tem ain adoka liasü.

Aser February ita Gaza nung teyari agütsüba chiyongtsü abeni Palestine nungertem nungtepa aliba mapang Israel sepaitemi injang khaloktsüba sülen Colombia-i Israel indang nok-nü aliba anena liasü.

Israel-i ano Gaza south tsütsü Rafah yimti nung amaktsü südi ta alimai

shisabolua alidang Bodhbarnü Colombia tiri iba o ya ashi.

Gaza Strip nung Israel mitkari Palestine nunger 34,500 dak tema tepsetogo aser iba tesem nung humanitarian crisis adoka lir aser mongin temi ayawara arutsü ashir.

Colombia-i tesendaktep rakdangtsü asoshi sentong aliba dak sendakba nung Israel sorkari telangzüba kecha agüja mali.

April ita tetenzüklena Colombia sorkari International Court of Justice (ICJ) nung

Israel-i kin ajunga samatsütsü merangba ken o nung adentsü mepishia liasü.

"Colombia indang nükjidong tulutibaji Gaza nung aliba Palestine nungertem, talisa tetsür, tanur aser matamabensartem aser teintet rogotem nem akok tashi teyari agütsütsü asoshi lir," ta Colombia-i shia liasü.

January ita UN indang tematiba court-ia Gaza nung Palestine nunger kin ajunga samatsü jenjang ajurua lir aser Israel-i iba amala mapa meinyaktsüla, ta shia liasü.

### Russia-i Ukraine rara nung chemical amshi...

Longkak aitba mapang civilian tem iba amala gasses nungi jenbur, saka sepaitem ali ongken nung gas masks meinok alirtem tsükchir temi injang khalokja lia jena aotsüsa akumer mesüra tango saketer.

Moscow-i chloropicrin amshiba aser CWC tanen makai mezüngshiba ama Aleksei Navalny aser Sergei aser Yulia Skripal nunger dak Novichok nerve agents amshiba yimya den kasa lir, ta State Department-i ashi.

February ita Arctic prison colony nung ajungbena asüsang Navalny dak 2020 küm Novichok miim mozü amshia liasü.

United Kingdom nung jenoka alisang taoba Russian military intelligence agent Sergei Skripal ya 2018 küm tepsettsü merang aser iba mapang par jala tera agi metepset.

Iba ken o bushisüngdangar British police officer ka kanga

shirang aser memeteti miim amshiba bottle tazüng agütsüla Dawn Sturgess ya teronem südi ta bilemer iba tzü ya la sasa temang nung mezür ita pezü lir asü.

Iba maparen nung Russia linük shilem lir ta British sorkari bushiteta liasü.

Moscow-ibo Skripal aser Navalny nem miim mozü agütsüba nung maden ta ashir.

US sangdong nung Moscow indang chemical aser biological weapons programmes nung sendaktepa aliba Russian state entities asem nem tenokdangba agütsür ta ashi, aser yangji Ukraine sepai anema chloropicrin amshitsü nungloktsüba specialised military unit ka dena lir.

Entities asem yariba Russian company pezü nem tenokdangba agütsür ta ashi.

Tenokdangba nungya item entities meyong US assets tem soita ayur aser America nunger parnok den shishilempatsü

memelar.

Ano US Treasury-ia Russia indang chemical aser biological weapons programmes nung shilem agiba military institutes nungi osettsüset aliba atema entities asem aser nisung ana nem tenokdangba agütsü.

Russia-i 2022 küm nungi tashi ajak amshia Ukraine amakba yong mera tasen aika agiba rongnung item tenokdangba ya dena lir.

Chemical weapons yangluba aser amshiba CWC ajanga nokdangar. Ajidang masü iba convention nung Russia aser US densema meyongnem agüja aliba linük 193 nung nokdanga aliba chemical tem yua aliba raksa indoktsü agizüka liasü.

Organisation for the Prohibition of Chemical Weapons (OPCW) senden amendang iba tezüngzüktep raksaogo ta Russia aser Ukraine na kati ka dak tai tongloktsüteper.

## BILEMDANGANG

"Akoktsü ta bilemba kijajia takok ka lir."